

elles dont est parlé en ce passage ; Lors que s'accomplira en nous ce que dit le Seigneur au 13. chap. de S. Matthieu, *Que les iustes reluisent comme le Soleil au Royaume de leur Pere.* Car le Pere des lumieres les remplira de lumiere par son regard fauorable, & par l'irradiation de sa face. A lui Pere, Fils & S. Esprit soit honneur & gloire és siecles des siecles.



SIXIEME SERMON.

Apocalypse XII.

1. *Il apparut un grand signe au ciel, asçavoir une femme reuestue du Soleil, ayant la Lune sous ses pieds, & sur son chef une couronne de douze estoiles.*
2. *Laquelle estoit enceinte, dont elle crioit, se trouuant en travail d'enfant & souffrant tourment pour enfanter.*
3. *Il apparut aussi un autre signe au ciel, & voici un grand dragon roux ayant sept testes & dix cornes, & sur ses testes sept diademes.*
4. *Et la queue d'icelui trainoit la tierce partie des estoiles du ciel, lesquelles il ietta en terre. Puis le dragon s'arresta deuant la*

femme qui deuoit enfanter: afin que quand elle auroit infantié, il deuorast l'enfant d'icelle.

5. *Et elle exfanta vn enfant masle qui deuoit gouverner toutes les nations, avec vn sceptre de fer, & son enfant fut rani à Dieu & à son thron.*



A condition de l'Eglise en sa naissance a esté vn augure & prediction pour le temps à venir. Comme elle a commencé, elle a continué & continuera iusqu'à la fin. Ses afflictions ont commencé en Abel & finiront au iour du iugement. C'est elle qui parle au Pseau. 129. disant, *Dés ma ieunesse ils m'ont fort tourmenté.* Par consequent ce seroit grand abus si elle se promettoit en sa vieillesse de la prospérité: veu que la nature du Royaume de Iesus Christ ne change point, qui est de regner au milieu de ses ennemis, Pseau. 110. Et que le monde ne va point en auant: Et que le diable n'a rien diminué de sa haine contre l'Eglise. Ains plustost en ces derniers temps il redouble sa rage pource que son temps est pres.

Telle a esté la condition de l'Eglise en tout temps: mais particulièrement depuis que le Fils de Dieu est venu au monde pour y planter son Royaume par la predication de l'Euangile. Car Satan a fait tous ses efforts pour esteindre & exterminer l'Eglise Chrestienne dès sa naissance,

lance, tellement qu'elle peut dire à bon droit,
Dès ma ieunesse ils m'ont grandement tourmenté.

Cette persecution a commencé par Iesus Christ, lequel dès sa naissance a esté persecuté. A peine en sa naissance a il trouué place en vne hostellerie. Peu apres sa naissance le Roy Herode a cherché de le faire mourir. Auant que de pouuoir marcher il a esté fugitif en Egypte.

Cette persecution, & l'issüe d'icelle, est le suiet du passage que nous vous auons leu. Saint Iean dit qu'un grand signe apparut au ciel, *assembler une femme enuironnée du Soleil, ayant la Lune sous ses pieds, & ayant sur sa teste une couronne de douze estoiles. Qui estoit enceinte & en travail d'enfant. Deuant laquelle se tint un grand dragon roux, attendant de deuorer l'enfant si tost qu'il seroit né. Mais cet enfant fut rai à Dieu & eleué en la gloire celeste, pour dominer sur le monde, & auoir un souverain empire sur toutes nations.*

Par cette femme, Mes Freres, est entendüe l'Eglise d'Israel, qui est l'Eglise de l'Ancien Testament. Elle apparoit au ciel pource que l'Eglise de Dieu n'est point de ce monde, & que ceux qui sont de cette Eglise sont bourgeois des cieux.

La clarté du Soleil qui l'environne est la parole de Dieu. Car cette parole est le Soleil des ames. Elle illumine les esprits de la vraye conoissance de Dieu. Elle en est reuestüe, pource que c'est son vrai & principal ornement.

La Lune, qu'elle a sous ses pieds, est l'instabilité & changement des choses inferieures.

G

Car la Lune est la plus basse des astres, & à chaque iour on y void du changement. Par là l'Esprit de Dieu nous enseigne, que ceux qui sont vrayement de l'Eglise de Dieu foulent aux pieds & regardent avec mépris les choses basses, & suiettes à changement.

Cette femme, qui est l'Eglise d'Israel, est couronnée de douze estoiles, pource qu'elle estoit composée de douze lignées, portant les noms des douze Patriarches enfans de Iacob. En quoi Iesus Christ a voulu que l'Eglise Chrestienne lui ressemblast, ayant establi douze Apostres qu'on peut à bon droit appeller les *Patriarches de l'Eglise Chrestienne*. Ce sont là les vingt & quatre Anciens qui assistans deuant le thrône, representent l'Eglise vniuerselle tant du Vieil que du Nouveau Testament, Apoc. 4.

Le fils dont cette femme estoit enceinte est Iesus Christ nostre Seigneur. Car c'est de l'Eglise d'Israel dont Iesus Christ est issu, comme dit S. Paul, au 9. chapit. de l'Epistre aux Romains, que *des Israelites Iesus Christ est issu selon la chair, qui est Dieu sur toutes choses benit eternellement.*

De cette femme, qui est l'Eglise d'Israel, est dit, qu'elle souffroit & crioit estant en trauail d'enfant, pource qu'elle a long temps languï & soupiré en attendant la venuë du Messias promis par les Prophetes. Comme Iesus-Christ dit à ses disciples, *Plusieurs Prophetes & iustes ont desiré de voir les choses que vous voyez & ne les ont pas veüs.* Tel estoit le desir ardent de Simeon & d'Anne, desquels S. Luc dit qu'ils estoient de

CEUX

Matth.
13.17.

LUC 2.

ceux qui attendoyent la deliurance & consolation d'Israel.

Ce grand dragon roux, qui attendoit que cet enfant nasquist pour le deuorer, est le diable, lequel est aussi appelé *l'ancien serpent*, pource que sous l'apparence d'un serpent qui lui a serui d'organe, il a seduit nos premiers parents, & a precipité le genre humain en la mort.

Or il a tasché de deuorer cet enfant nouveau né en incitant le Roy Herode à le faire mourir peu apres sa naissance. Car l'Escriture attribue au diable les meschantes actions que les Rois & Seigneurs de ce monde font à l'instigation & par le mouuement du diable, duquel S. Paul aux Ephesiens chap. 2. dit, qu'*il opere avec efficace es enfans de rebellion.*

Mais Dieu a deliuré son Fils de la main d'Herode, & l'ayant conduit & adressé par sa vertu diuine durant son seiour ici bas, finalement l'a élevé en gloire, *lui ayant donné un nom par dessus tout nom, & toute puissance au ciel & en la terre.* Phil. 2. Matth. 28.

Ce dragon est roux, ou de couleur rouge, pource que c'estoit & est la couleur de l'Empire Romain tant ciuil que Hierarchique persecutant l'Eglise, & de leur Senat. Et les sept testes sont les sept montagues sur lesquelles est assise la ville qui dominoit alors, & qui domine encore sur les royaumes de la terre, comme il est dit expressément au 17. ch. de l'Apocalypse.

Ce passage estant ainsi sommairement expo-

fé, demande vne plus exacte & particuliere explication.

En premier lieu l'Eglise est représentée par la figure d'une femme, pource que l'alliance estroite de Dieu avec son Eglise est souuent comparée à vn mariage, non seulement au Nouveau Testament, mais aussi au Vieil. Dieu mesme parle ainsi à son Eglise au 2. chap. d'Osee, *Je l'espouseray pour moy à tousiours, en iustice, en iugement & en compassions.* A cela est employé le Pseau. 45. & le Cantique des Cantiques, & le 16. chapitre du Prophete Ezechiel.

De ce mariage le contract est l'Euangile, dont les Apostres & Euangelistes ont esté les Notaires. Iesus Christ l'a signé de son sang: & plusieurs Martyrs y ont apposé leurs seings. L'Esprit d'adoption est l'anneau nuptial par lequel Dieu selle & imprime ses promesses en nos cœurs. L'habit nuptial dont Iesus Christ orne & pare son Eglise est l'Esprit de sanctification & regeneration, dont est parlé au 19. ch. de l'Apocalypse, où il est dit, que *l'Espouse s'est parée, & qu'il lui a esté donné de se vestir d'un cresse pur & luisant, qui sont les iustifications des Saints.*

Lesquelles façons de parler empruntées du mariage, nous sont vne exhortation à aimer Iesus Christ sur toutes choses, & lui garder fidelité & integrité de corps & d'esprit, & abandonner toutes choses pour le suiure & obeir à sa vocation. Selon qu'il est dit au Pseume 45. *Escoute fille & considere, oublie ton peuple & la maison de ton pere & le Roy mettra en toy son affection.*

De

De cette femme, qui est l'Eglise, il est dit, qu'elle est reuestuë ou environnée du Soleil. Ce Soleil est la parole de Dieu, laquelle est la lumiere des ames, qui dissipe les tenebres d'ignorance, lesquelles meinent les hommes en perdition. Ainsi le Prophete Esaïe au 9. chap. parlant de la vocation des Gentils par la predication de l'Euangile, dit, que *le peuple qui gisoit en tenebres a veu grande lumiere.* Et S. Paul au 26. chapit. des Actes, dit que Iesus Christ a annoncé la lumiere aux peuples : *Ta parole est une lampe à mon pied, & une lumiere à mon sentier.* Pseau. 119. Et ce n'a point esté sans mystere que Iesus Christ avec sa salive a gueri les yeux d'un aueugle : car par là il donnoit à entendre que ce qui sort de la bouche du Seigneur remédie à nostre aueuglement naturel. C'est cette lumiere qui nous radresse de nostre égarement. Qui nous fait discerner les vrais biens, d'auec ceux qui n'en ont qu'une fausse apparence. Qui réjouit le cœur par les nouvelles de paix & reconciliation avec Dieu par Iesus Christ.

C'est vn Soleil dont les rayons penetrent iusqu'au profond des cœurs. Vne lumiere qui non seulement illumine les yeux, mais qui aussi donne des yeux : Qui non seulement éclaire les voyans, mais qui aussi guerit les aueugles. Le Soleil qui nous éclaire se leue à fleur de terre : mais la parole de Dieu est vne lumiere qui nous est venuë du plus haut des cieux. Dont aussi Iesus descendant des cieux pour nous apporter cette lumiere, est appelé *l'Orient d'en-haut*, Luc. 2. 78.

Et comme la lumiere du Soleil est viuifiante, & ne sert pas seulement à éclairer, mais aussi donne vie aux plantes, & sert à la generation des animaux ; ainsi la parole de Dieu en éclairant les ames les viuifie, & est au cœur de l'homme vne semence de vie eternelle. Pour cette cause l'Escriture joint fort souuent la vie & la lumiere, disant, que Iesus Christ *a mis en lumiere la vie & l'immortalité par l'Euangile*, 2. Tim. 1. Et Dauid au Pseuime 36. *Source de vie gist en toy, & par ta clarté nous voyons clair*. Et S. Paul Eph. 5. *Reueille toy qui dors & te releue des morts, & Christ t'éclairera*.

Cette lumiere est propre & particuliere à l'Eglise de Dieu, laquelle est semblable à la terre de Gossen en Egypte, laquelle seule estoit éclairée pendant que le reste de l'Egypte estoit couuert d'espaisses tenebres. Comme il est dit au Pseau. 147. *Dieu a déclaré ses paroles à Iacob, & ses ordonnances à Israel : il n'a pas fait ainsi aux autres nations*.

Pour esteindre cette lumiere, Satan suscite des rudes vents de persecutions, & oste aux peuples l'Escriture sainte, & leur a donné vn seruice en langue non entendue, & pour des fideles Predicateurs leur a donné des pierres & des images muettes. Car il est le Prince des tenebres. Par l'ignorance des peuples il a établi son empire: faisant comme les larrons de nuit qui soufflent les chandelles.

Ici ne sera point hors de propos de considerer la difference de ces deux tableaux que le
liure

liure de l'Apocalypse nous met deuant les
 yeux. Dont l'vn est le portrait de l'Eglise, &
 l'autre est le portrait de la grande paillardie au
 17. chapit. de l'Apocalypse. L'Eglise nous est
 representée vestuë & environnée de la clarté
 du Soleil, laquelle nous vient des cieus, laquel-
 le clarté est la vraye connoissance de Dieu par
 sa parole; voila tout son ornement. Mais la
 grande paillardie est descrite accoustrée de
 pourpre, & d'escarlade, parée d'or & de pier-
 res precieuses, & de perles. L'Apostre S. Pierre
 en sa premiere Epistre fait vne semblable com-
 paraison, disant, *que le vray parement de la femme
 n'est pas celui de dehors, qui gist en entortillement de
 cheueux ou parure d'or, ou accoustrement d'habits.
 Mais en l'incorruption d'un esprit doux & paisible,
 qui est de grand prix deuant Dieu.* Les femmes
 qui naturellement sont mal pourueüs de
 beauté, s'attiffent plus curieusement, & y ap-
 portent plus d'artifice. Il est le mesme en la
 religion. Car les fausses religions se parent
 d'vn grand lustre exterieur. Elles estallent la
 splendeur de force ceremonies & ornemens,
 & processions magnifiques; par vn grand bruit
 de cloches elles estourdissent les oreilles des
 idiots. Ayant esteint la lumiere de l'Euangile,
 elles allument des cierges en plein midi. Ainsi
 celui qui en ce temps se dit * Vicaire de Dieu
 & chef de l'Eglise vniuerselle est vestu de scar-
 latte & a vn manteau bordé de perles penda-
 ntes, & a vne triple couronne luisante de pier-
 reries.

* Sacrar.
 Cærem.
 l. 1. Scet.
 5. cap. 6.
 Indu-
 tur cali-
 gis ru-
 beis, san-
 daliis
 rubeis
 cingulo
 rubeo,
 Birreto
 rubeo, &
 stola or-
 nata
 cum
 perlis
 penden-
 tibus.

Cette exhortation, à preferer la lumiere de la parole de Dieu à toute la splendeur mondaine, nous meine à ce qui est adjousté, asçauoir que *l'Eglise a la Lune sous ses pieds*, c'est à dire, qu'elle mesprise & foule aux pieds l'instabilité & changement des choses inferieures, elle ne fait nul cas des richesses, des voluptés & de la gloire du monde. Vous sçauiez que les choses que nous regardons de loin nous semblent fort petites, vne grande maison semble être vne petite cabane : ainsi quand vn homme a éloigné son cœur de l'amour de ce monde, les choses qui lui sembloient grandes auparauant lui semblent petites & contemptibles. Iesus Christ qui auoit tous les biens du monde en sa puissance, a monstre combien il en faisoit peu de cas, se reduisant soi mesme à vne extreme povreté. Ce peu qu'il auoit d'argent il l'a donné en garde à vn qu'il sçauoit être larron & le pire de tous les hommes. Et Dieu monstre quel cas il fait des richesses de ce monde, en ce que ordinairement il en donne plus liberalement aux plus meschans. Les Anges n'ont point d'argent, desquels le moindre est plus riche que le plus grand Roy qui soit en la terre. Si le fidele en seruant à Dieu est menacé de povreté, il dira à Satan ce que le Roy de Sodome disoit à Abraham, *Laisse les ames & pren pour toy la cheuance*. Il fera comme Ioseph, plustost que d'offenser Dieu, il quittera son habit, afin d'auoir son ame pour dépouille.

Tout ainsi que la flamme par son agitation
conti-

continuelle, & par sa pointe toujours tournée en haut, monstre qu'elle n'est pas ici en son lieu naturel: ainsi le fidele par son inclination continuelle vers les choses celestes, monstre qu'il est estrange en ce monde, & que ce n'est pas ici le lieu de repos.

Mais les hommes de ce monde ont le cœur attaché aux choses terriennes. A eux se peut appliquer ce que Jacob (quoy qu'en autre sens) disoit à son fils Judas, *ils attachent leur asne au* Gen. 49. *aussep de la vigne.* Ils attachent leurs convoitises brutales aux delices de ce monde.

Tout ainsi que la Lune par son interposition fait eclipser le Soleil & nous derobbe sa clarté, ainsi l'amour des voluptés & des richesses qui sont ici signifiées par la Lune, par son interposition nous derobbe la clarté de ce Soleil dont est parlé en ce passage, & empesche l'efficace de la parole de Dieu. Pensons à ces choses, & destournans nos cœurs de l'amour de ce monde, *travaillons non point pour le pain qui perit, mais pour celui qui est permanent à vie eternelle. Le monde passe & sa convoitise, mais qui fait la volonté de Dieu demeure eternellement.*

La suite de ce texte nous oblige à vous parler aussi de ce dragon rous, qui est aussi appelé *l'ancien serpent.* Ce dragon rous sans doute est le Prince & le plus puissant de tous les diables, lequel avant sa reuolte contre le Createur, ayant esté le prince & le maistre d'une multitude d'esprits Angeliques, depuis sa cheute a retenu cette superiorité sur tous les esprits ma-

liens compagnons de sa reuolte. Car cette superiorité lui estant naturelle, le peché survenu n'a point changé les loix ni l'ordre que Dieu a mis en la nature, en mesme façon qu'après le peché de l'homme, l'homme est demeuré maistre & supérieur sur les autres animaux.

De ce Prince des diables l'Escriture parle souvent. Iesus Christ au 14. chapitre de S. Jean l'appelle *le Prince de ce monde*. S. Paul l'appelle *le Dieu de ce siecle*, 2. Cor. 4. Et *le Prince des puissances de l'air*, Eph. 2. Et les Iuifs disoyent que *Iesus Christ chassoit les diables par Beelzebub le Prince des diables*. Au iour du iugement le Iuge dira aux reprobés; *Allez maudits au feu eternel qui est preparé au diable & à ses Anges*. Et en ce 12. chapitre de l'Apocalypse le dragon roux & ses Anges donnent vne bataille contre Michel & ses Anges.

C'est sans doute ce puissant esprit qui a seduit nos premiers parents : qui tragasse par toute la terre pour seduire les hommes, comme il est dit au commencement du liure de Job. C'est celui sans doute qui a osé tenter Iesus Christ au desert. Il disoit en soi-mesme, si ie puis esmouuoir sa conuoitise par quelque tentation d'orgueil ou de deffiance, ie le rendray incapable d'estre le Redempteur du monde, car Dieu ne reçoit point pour payement vne iustice imparfaite.

Sans doute ce Prince des diables a esté demandant sa cheute vn esprit eminent en puissance & en vertu; lequel estant deuenu admirateur
de

de la propre vertu a peché par orgueil, & de la plus excellente creature est deuenue la pire de toutes. Car des choses les plus excellentes les corruptions sont les pires : & la cheute est plus rude d'un lieu plus eleué. Car qu'entre les esprits immondes il y en a de pires que les autres Iesus Christ nous l'enseigne, disant, que *vn esprit malin estant sorti d'une maison y retourne peu apres, & y ameine avec soy sept esprits pires que lui.*

Matt. 12.
Luc 11.

C'est là, Mes Freres, nostre capital ennemi: dont aussi il est appelé *Satan*, c'est à dire, aduersaire. Si vous demandez la cause de cette haine, veu que nous ne lui auons fait aucun mal, nous pouons vous en donner trois causes. La premiere est, qu'estant ennemi de Dieu il hait par consequent les œuvres de Dieu, & principalement il hait l'œuvre de Dieu qui porte l'image de Dieu. La deuxieme cause qui le picque & eguillonne contre l'homme est l'envie. Il dit en soi-mesme, Cette creature mortelle, sera-elle receüe en la gloire dont ie suis debouté? Adjoustez que cet esprit malin sçait qu'entre les hommes il y en a vn qui brisera la teste du serpent & qui le iugera au dernier iour. Particulierement en ce dernier temps sa colere se redouble, pource qu'il voit plusieurs ames lui estre arrachées par la predication de l'Euangile.

C'est vn ennemi vigilant & qui ne dort point. Vn ennemi inuisible qui surprend les homes sans estre veu. Qui est sçauant es saintes

Escritures, desquelles mesmes il s'est serui quand il a tenté Iesus Christ nostre Seigneur. Qui, outre la force & vigilance de son esprit, a l'experience presque de six mille ans. Il se change en toutes sortes de formes pour seduire, iusqu'à *se transformer en Ange de lumiere*. Le pis est, qu'il a intelligence secrette avec nos conuoitises, qui lui ouurent l'entrée es cœurs des hommes. S. Pierre dit que *notre adversaire le diable chemine comme un lion rugissant à l'entour de nous cherchant qui il pourra deuorer.*

1. Pier. 5.
3.

O si vous auiez les yeux de l'esprit aussi ouverts que ceux du corps, vous verriez cet esprit malin pendu aux oreilles des peuples & des grands, taschant de verser dans les cœurs des conseils de sang, & les animant à la persecution. Que si vous pouuiez penetrer & reconnoistre quelle est la trame de ses conseils, quelles sont les profondeurs du mystere d'iniquité: combien seriez-vous saisis d'horreur: combien admireriez-vous la puissante bonté de Dieu qui tient ce dragon roux enchainé de la chaine de sa prouidence, & qui nous fait subsister parmi tant de puissans ennemis? Et vous preparez à beaucoup de combats, & tascheriez à vous pourvoir de cette armure complete que S. Paul décrit au 6. chapit. aux Ephesiens, afin de resister au mauuais iour.

De ce dragon roux, qui est le diable, il est dit, qu'il traîne apres sa queue la troisieme partie des estoiles du ciel, & les jette en terre. Ne croyez pas qu'il soit en la puissance du diable d'arracher

d'arracher du ciel les estoiles : S'il pouvoit le faire, il pourroit par la mesme puissance renverser le ciel & la terre. Mais l'Eglise de Dieu en ce monde est souuent appelée CIEL, & le royaume des cieuz, pource que Dieu y regne d'une façon celeste & spirituelle, & que ceux qui sont de cette Eglise sont appelés à estre bourgeois des cieuz, & que leur conuersation doit estre celeste. C'est pourquoy les Pasteurs de l'Eglise souuent sont appelés Anges : Ainsi au 2. & 3. chap. de l'Apocalypse, les Pasteurs des sept Eglises sont appelés Anges. Et au 3. chap. de Malachie, Iean Baptiste est appelé l'Ange du Seigneur. Au 14. chap. de l'Apocalypse, S. Iean parle ainsi : *Je vi vn autre Ange volant par le milieu du ciel, ayant l'Euangile eternal, afin qu'il euangelizast à ceux qui habitent sur la terre, par lequel Ange volant par le ciel & preschant l'Euangile, est entendu vn fidele pasteur preschant en ce ciel, qui est l'Eglise, la doctrine de l'Euangile.*

Les estoiles qui luisent en ce ciel sont ceux qui sont fideles & croyans en Iesus Christ, ou qui au moins font profession de l'estre. Ils sont appelés *estoiles*, pource qu'ils sont mis en ce ciel qui est l'Eglise pour y luire : comme dit Iesus Christ, Matth. 5. *que vostre lumiere luisse deuant les hommes.* Telle est la vanterie du Roy de Babylone, au 14. chap. d'Esaië, *Je monteray aux cieuz, ie surhausseray mon throne par dessus les estoiles.* Il se proposoit de s'affuier le peuple de Dieu, & poser son throne en Ierusalem.

Nous auons vn pareil exemple au 8. chap. de Daniel, où le Prophete parlant du Roy Antiochus l'illustre, grand persecuteur de l'Eglise; dit qu'il s'agrandira iusqu'à l'armée des cieus, & iettera bas plusieurs estoiles; & les foulera; pource qu'il a opprimé le peuple de Dieu, & en a fait tomber plusieurs par réuolte, les destournant de l'alliance de Dieu.

L'Apocalypse ensuit le langage de Daniel. Car au 8. ch. il parle d'vne grande estoile nommée *Absynthe*, laquelle tombant du ciel par sa cheute rendra les eaux ameres. Cette grande estoile est quelque Pasteur celebre & de grande autorité, qui reluisoit en l'Eglise, lequel se revoltant de la foy trouble les peuples, & apporte vn grand scandale en l'Eglise de Dieu.

Ainsi se doit entendre ce passage auquel il est dit, que le dragon roux traîne apres sa queue la tierce partie des estoiles, & les iette en terre. Le sens est que le diable par ses artifices & par sa cruauté, fera reuolter vne grande partie de ceux qui estoient en l'Eglise & faisoient profession de la doctrine de l'Euangile. Et est dit qu'il iette en terre ces estoiles, pource qu'il retire leurs pensées & affections des choses celestes, & les tourne vers les choses terriennes.

Ici donc nous auons vne prediction de grandes reuoltes qui doiuent aduenir en l'Eglise de Dieu. Il a esté ainsi de tout temps. Faut bien dire qu'il y a eu des grandes reuoltes deuant le deluge, quand l'Eglise de Dieu a esté reduite à la famille de Noé. Les reuoltes ont esté grandes

des quand tout le peuple d'Israel demeurant en Egypte est deuenu idolatre, comme nous apprenons du 20. chap. d'Ezechiel. Les revoltes ont esté grandes du temps d'Achab & de Iezabel, puis qu'Elie pensoit estre demeuré seul. Antiochus l'illustre a fait par sa cruauté revolter vn grand nombre de Iuifs de l'alliance Dieu. Les revoltes seront grandes au temps dont est parlé au 13. chap. de l'Apocalypse, où il est predict que toute la terre rauie d'esbahissement courra apres la beste. Et au temps duquel parle Iesus Christ au 18. chap. de S. Luc, disant, *Cuidez vous que quand le Fils de l'homme viendra il trouue de la foy en la terre?* S. Paul en la 1. à Timothée chap. 4. predict qu'*és derniers temps quelques vns se revolteront de la foy, enseignans à s'abstenir des viandes, defendans de se marier.* On ne s'esbahit point que la mer en ce temps iette à bord force escume, puis qu'elle a fait le mesme dès le commencement du monde. On ne s'esbahit point si vn homme qui a ietté force phlegmes en sa ieunesse en iette encor en sa vieillesse En effect quand vn homme vicieux, attiré par argent & par auancement au monde, se revolte de la vraye religion, c'est comme si l'Eglise auoit craché vn phlegme ou vomi vn ver. Si le nombre des personnes en est diminué, le corps de l'Eglise en est plus sain.

Ces choses adviennent par la permission de Dieu, qui par persecutions & tentations meine les hommes aux eaux d'espreue, & reiette ceux qui s'abandonnent tout entiers à

la iouissance des choses de ce monde, & retient ceux qui les lappent comme en passant & sans s'y arrester. Il secouë cet arbre pour faire tomber ceux qui ont le cœur gasté. Vne persecution est vn van avec lequel il vanne son aire, afin que la paille s'en aille au vent, mais il retient le bon grain en son grenier.

Sur cela vos Pasteurs sont saisis d'une grande crainte & deffiance. Car quand nous considerons la vie & les mœurs du troupeau que Dieu nous a commis, nous auons grand suiet de douter de la perseuerance de plusieurs. Considerans la vie oisive, les debauches, les rancunes, la chicanerie en procez, l'auarice & la vanité de plusieurs, nous disons en nous mesmes, Sont-ce là des gens propres à porter la croix de Christ? Des personnes si ardentes au gain pourroyent-elles se resoudre à perdre tout leur bien pour la profession de l'Euangile? Des hommes seruans à leur ventre & à leurs plaisirs pourroyent-ils iusner en prison pour la parole de Dieu? Des hommes qui se sont corrompus en la prosperité, pourroyent-ils subsister en l'adversité? Nous auons donc grand suiet de craindre qu'en vne rude espreuue ce troupeau ne souffrist vne grande diminution.

Mais pour clorre ce propos, nous finirons par ce que nous vous auons dit au commencement, asçauoir que l'Eglise de l'Ancien Testament souffroit & estoit trouuillée en l'attente du Messias promis. Cela nous doit seruir d'exemple. Car comme les fideles du Vieil Testa-

Testament soupiroyent, de sirans ademment le premier auenement de Iesus Christ, aussi nous deuons souhaiter ardemment son second auenement. C'est le souhait que fait l'Eglise sur la fin de l'Apocalypse, disant, *Vien Seigneur Iesus, vien.* Et Iesus Christ, parlant des signes auant-coureurs de sa venue, dit, *Quand ces choses commenceront à auenir dressez vos testes en haut, d'autant que vostre deliurance approche.* Car nous ne pouuons approuuer la priere des anciens Chrestiens qui prioyent pour le retardement de la fin, pource qu'ils craignoyent la venue de l'Antechrist qui doit preceder le dernier auenement du Seigneur. Mais la gloire & louange de Dieu doit estre preferée à toute autre consideration. Or ce sera en ceste derniere & grande iournée que Dieu sera souverainement glorifié & le regne de son Fils pleinement establi. Alors il viendra recueillir nos cendres, il fera comme vn pere qui se iette en vne maison qui brusle pour en arracher ses enfans. Alors le dragon roux sera lié de chaines eternelles, & precipité en l'abyssme. Alors, comme dit S. Paul, il viendra pour estre glorifié en ses saincts, & estre rendu admirable en tous les croyans. A lui avec le Pere & le S. Esprit soit honneur & gloire eternellement.

Luc 21.

2. The II.
1. 10.

H